

## ■ GLOSSA

# La bumba da JDP

DA ROMAN CAVIEZEL\*

**T**ge targlinais anc en-turn, si là, per l'amur da Dieu? L'ampla sbrinzla gia oransch, curt avant il cotschen! Quai ha ditg Stefan Engler, precis uschia. Betg per corona, tabaloris, ni per il luf, la pcd u la Greta, na, per il rumantsch mettain! Gea, mes chars e mias charas, nus givlain or da l'ultima rusna. Qua na gida er noss legendar dun musical pli nagut. Cun ina suletta fora na po gnanc in Fränzli sunar ina melodia andanta. Nus essan pers. Allegra catastrofa!!!

**M**a na, mann, i dat anc in uman che ans po salvar da la perdi-ziun: JDP, noss minister da cultura! In um da num e pum, pelvair. Guardai be co che quel po star quiet malgrad las turbulenzas, tut pacific, gewehrbeifuss. In vair grip en la refratga. In sco el na sa lascha impressiunar da nagut. Cifras dramaticas, rapports, artitgels ed attatgas, tut peanuts che al vegnan gnanca fin l'oss radund! Be tranter nus, ensasez chapibel, u betg? Per in che ha gia vesì - e survivì - tut autras bovas e burascas, gea schizunt (whistle-)blowerias.

**E**d el n'è per cas betg ch'el dorma, ma fa-



schai quint, betg el! La nobla retegnientscha, l'apparenta passivitat, tut betrics, ina spezia d'engion da guerra. Quel ans zuppa franc insatge. Forsa in ov da... JonDomenicus? Ch'il lumpazi ha cuà or en il tschelà. Quel servitur dal pievel na penda eba betg mintga toffa ch'el fa vid il sain grond. U plitost ina bumba? Ecco, – naturalmain betg ina da quellas da Son Silvester cun tut quels alleghers chapellins, tschivlots e confettis! – na, in'arma da protecciun-promoziun da linguas sco ch'i tutga, spectrum lartg, potentia e irresistibla, ch'el lascha lura detonar cur che nagin spetga? Sco l'inscunter cun la Viola da Kampfjets ch'el ha arranschà senza savair da ses collegas da la regenza. «Betg tut sto vegnir reglà sin il pli aut nivel.» Raschun ha'l. Basta, sche mo il rumantsch vegn salvà. Almain tant dretg da viver

sco ils primats da Basilea ha bain er quel, u betg?

**T**uttina... stgisai, sar Jon Domenic, nagut encunter vossa bumba, ma dovri insumma grondas mesiras da promoziun per il rumantsch? N'essan nus betg gia sin buna via vers il spendrament? Pensai be a Maiavilla, nua ch'in fervent magister ha cumenzà a reconquistar il territori rumantsch perdi! Precis, cun entruidar a trais (sic!) scolaras da lingua tudestga la sublima favella dutscha lamma. Qua è'la, youguys: die Wende, la midada, the change! Oz Maiavilla, damaun il mund: Aschera, Cuvlignas, Cuir...! Eviva il rumantsch!

**E**lura pir quest qua: «Rätoromanen-Fraktion wächst und trifft». Carlo, Rafael, Marino e Lars (Chur 97) discurran tranter els sursilvan, er sin la piazza da ballape. Quai irritescha talmain ils adversaris ch'els incasseschan gols sco chazs furads. Il rumantsch sco bavronda magica, sche quai n'è betg empermettent. Forsa ha Stefan Engler gea patratgà vi da la lescha da chatscha cur ch'el ha discurrì da l'ampla cotschna?

\*Roman Caviezel è stà scolast gimnasial.